

- मुख्यमंत्री भजनलाल शर्मा सवाईमाधोपुर, करौली अर धौलपुर जिला मांय घणी बिरखा वाळा हलकां रो हवाई दौरो कीनो-गांव वाळा ने हर संभव मदद रो भरोसो दिरायो।
- झारखण्ड रा पैली वाळा मुख्यमंत्री शिबू सोरेन देवलोक व्ह्या-राष्ट्रपति अर प्रधानमंत्री समेत केई नेता सोरेन ने सिरधाभाव सागे याद कीना।
- प्रदेश री आंगनबाड़ी कर्मचारियां ने राखी रा उपहार रा तौर ऊं 501 रुपया दिया जावेला।
- केन्द्रीय मंत्री गजेन्द्र सिंह शेखावत जनता ऊं हर घर तिरंगा अभियान ऊं जुड़बा री अपील कीनी।

000

मुख्यमंत्री भजनलाल शर्मा घणी बिरखा रा असर वाळा सवाईमाधोपुर अर करौली जिला रो हवाई दौरो कर र हालात रो जायजो लीनो। ई दौरान आपदा प्रबंधन मंत्री डॉ. किरोडी लाल मीणा ई वां सागे मौजूद रह्या। वे सवाईमाधोपुर जिला रा चकेरी, जड़ावता, अचनोटी, मैनपुरा, धनौली अर सूरवाल अर करौली जिला रा मंडरायल हलका रो दौरो कीनो। दौरा पाछे वे अहलकारां ने भारी बिरखा री फेंट मांय आया लोगां ने बेगी मदद पूगावण रा हुकम दीना। मुख्यमंत्री चकचेनपुरा री हवाई पट्टी माथे जनता री समस्यावां सुणी अर लोगां ने हर संभव मदद रो भरोसो दिरायो।

मुख्यमंत्री करौली जिला रा रानीपुरा मांय ई गांव वाळां सागे मुलाकात कीनी। रामजल सेतु परियोजना रो जिक्र करता थकां मुख्यमंत्री कह्यो के सरकार जनता री पाणी री जरूरत बेगी ई पूरी करण री कोशिश कर रही है। आपदा प्रबंधन मंत्री कह्यो के हलका मांय नुकसान रो सर्वे करा र मुआवजो दिरायो जावेला।

000

झारखंड रा पैली वाळा मुख्यमंत्री शिबू सोरेन देवलोक व्हे गया है। राष्ट्रपति द्रौपदी मुर्मू, प्रधानमंत्री नरेन्द्र मोदी अर पख-विपख रा केई नेता शिबू सोरेन रे देवलोक व्हेवण परां शोक जतायो है। राष्ट्रपति सोरेन रे देवलोक व्हेवण ने सामाजिक न्याय रा हलका रो मोटो नुकसान बतायो। प्रधानमंत्री वां रा शोक संदेश मांय कह्यो के सोरेन जमीं ऊं जुड़्या नेता हा अर आखी उमर आदिवासी समुदायां, गरीबां अर वंचित तबका री जनता ने मजबूत बणावण सारू काम कीनो। प्रधानमंत्री मोदी अस्पताल पूग र शिबू सोरेन रा आखिरी दर्शन कीना। राज्यपाल हरिभाऊ बागडे अर मुख्यमंत्री भजनलाल शर्मा, प्रदेश रा पैली वाळा मुख्यमंत्री अशोक गहलोत, पैली वाळा उपमुख्यमंत्री सचिन पायलट समेत राज्य रा केई नेता शिबू सोरेन रे देवलोक व्हेवण परां गहरो दुःख जतायो है। सोरेन आज संवारे दिल्ली रा एक गैर-सरकारी अस्पताल मांय देवलोक व्हे गया। 81 साल रा शिबू सोरेन करीब डोढ महीना ऊं अस्पताल मांय भर्ती हा। वां बगत रा बिहार रा हजारि बाग मांय जन्म्या सोरेन ने दिशोम गुरु अर गुरुजी रा नाम ऊं ई पिछाण्या जाता हा। सोरेने केई दफा सांसद चुण्यी ज्या। बिहार ऊं न्यारो झारखंड राज्य बणावण रा आंदोलन मांय ई वां रो खास काम हो।

000

प्रदेश मांय मौसमी बीमारियां री रोकथाम अर जागरुकता सारू स्वास्थ्य दल, आपके द्वार कार्यक्रम चलायी ज्यो है। ई रा तैत स्वास्थ्य विभाग री टीमां घर-घर जा र सर्वे कर रही है। ई दौरान मच्छरां रे कारण व्हेवण वाळी बीमारियां रा बारा मांय जाग जगावण सागे इण रा मरीजां री पिछाण री कोशिश करी जावेला। चिकित्सा विभाग री उपनिदेशक डॉ. निर्मला शर्मा आकाशवाणी सागे बातचीत करता थकां बतायो के सर्वे रा काम मांय आशा सहयोगिनियां अर सीएचओ री मदद ली जा रही है।

000

प्रदेश रा सगळा मेडिकल कॉलेजां मांय अंगदान अर ऊपतू अंग लगावण रो सुबीतो मुहैया करावण री कोशिश करी जावेला। चिकित्सा शिक्षा सचिव अम्बरीष कुमार अंगदान दिवस रा सिलसिला मांय आज जयपुर रा सवाईमानसिंह मेडिकल कॉलेज मांय राख्यी ज्या जागरुकता कार्यक्रम मांय आ जाणकारी दीनी। वे बतायो के प्रदेश मांय हर साल करीब दस हजार मौतां सड़क हादसां रे कारण व्हे है। आं मांय ऊं दिमागी तौर ऊं मर्या

करीब दस फीसदी लोगों रा अंग दान कर र केई मरीजां ने नुवी ज़िन्दगी मिल सके है। चिकित्सा शिक्षा सचिव कह्यो के जीवन रा असंतुलित तरीकां, हादसां अर जेनेटिक कारणां ऊं ऊपतू अंग लगावण री ज़रूरत बध रही है। ई कारण स्वस्थ जीवनशैली अर संतुलित खान-पान ज़रूरी है। कार्यक्रम मांय अंगदान रा हलका मांय काम करण वाळी संस्थावां अर अंगदान करण वाळां रा पिरवार वाळां रो मान करी ज्यो।

000

राज्य वित्त आयोग रा नुवा बणायी ज्या अध्यक्ष अरुण चतुर्वेदी आज मुख्यमंत्री भजनलाल शर्मा सागे मुलाकात कीनी। मुख्यमंत्री रा रेहवास माथे व्ही ई मुलाकात रे दौरान वे पंचायतीराज संस्थावां अर नगरीय निकायां ने माली तौर ऊं मज़बूत बणावण रा जतन अर आयोग ऊं जुड़्या मुद्दा माथे चर्चा कीनी। आयोग पंचायतीराज अर नगर निकायां री माली हालत रो जायजो ले र इण मांय सुधार सारू ज़रूरी राय देवेला अर वां सारू टैक्स, ड्यूटी अर आमदनी हासिल करण री सिफारिशां करेला।

000

सिरोही ज़िला रा पिंडवाड़ा मांय आज एक बण रह्या मकान री भीत पड़ जावण ऊं तीन मजूरां री मौके ई मौत व्हे गयी। हादसा मांय घणा जख्मी पांच मजूरां ने आबूरोड़ रा अस्पताल मांय भर्ती करायी ज्या है। पिंडवाड़ा रा डी.एस.पी. भंवर लाल चौधरी बतायो के रोहिड़ा हलका रा भारजा गांव मांय व्ह्या ई हादसा रे कारण कमठाणा माथे काम कर रह्या आठ मजूर मलबा मांय दब गया। हादसा री जाणकारी मिलता ई ज़िला कलेक्टर अल्पा चौधरी मौके पूग र तुरत बचाव रा काम सारू कराया।

000

प्रदेश मांय काल बहनां रो सुरक्षा-सम्मान पर्व मनायो जावेला। महिला अर बाल विकास विभाग रा शासन सचिव महेन्द्र सोनी बतायो के राखी रा त्यौहार रा सिलसिला मांय ओ आयोजन राख्यो जा रह्यो है। जयपुर रा बिड़ला ऑडिटोरियम मांय राख्या जावण वाळा ई कार्यक्रम मांय मुख्यमंत्री भजनलाल शर्मा आंगनबाड़ी बहनां ने मान रा तौर ऊं रकम देवेला। **मुख्यमंत्री संग रक्षाबंधन** मुद्दा माथे व्हेवण वाळा ई जळसा मांय प्रदेश री 1 लाख 21 हजार आंगनबाड़ी बहनां ने राखी रा उपहार रा तौर ऊं 501 रुपया वां रा बैंक खातां मांय भेज्या जावेला।

000

तिरंगा झण्डा रा प्रति निष्ठा अर गर्व रो दरसाव करण सारू हर घर तिरंगा अभियान चलायो जा रह्यो है। 2 अगस्त ऊं चलायी ज्यो ओ अभियान 15 अगस्त ताई चालेला। हर घर तिरंगा अभियान रा तैत हर कोई स्वतंत्रता दिवस रे मौके घर माथे तिरंगो झण्डो फहरावे है। केन्द्रीय संस्कृति अर पर्यटन मंत्री गजेन्द्र सिंह शेखावत जनता ऊं देश रा गौरव रा ई अभियान ऊं जुड़बा री अपील कीनी है।

000

सावन रा पवित्र महीना रो आज चौथो अर आखिरी सोमवार है। शिव भक्तां सारू ओ महीनो घणो खास है। पेश है एक रपट—

000

राज्य मांय भारी बिरखा रो दौर फिलहाल मंदो पड़ ग्यो है, हालांकि केई ठोडां हल्की ऊं मझला दर्जा री बिरखा व्हे रही है। काल अलवर, भरतपुर, धौलपुर, दौसा अर करौली जिलां सारू बिरखा रो येलो अलर्ट जारी करी ज्यो है। मौसम विभाग राज्य रा उतराद-ऊगणी हलकां मांय आवता तीन-चार दिन कठे-कठे हल्की ऊं मझला दर्जा री बरसात रा आसार जताया है। राज्य रा आतूणी हलका मांय आवता पांच-छह दिन ताई कठे-कठे हल्की बारिश रो अनुमान है। ई बीचे लारला चौबीस घंटा मांय सब ऊं बत्तो 5 सेंटीमीटर पाणी भरतपुर जिला रा बयाना मांय बरस्यो। ई रे अलावा दौसा, धौलपुर, प्रतापगढ़ अर बारां जिलां मांय ई कठे-कठे 1 ऊं 4 सेंटीमीटर ताई मेह बरस्यो। म्हाणा उदयपुर खबरनवीस बतायो के तेज बारिश रो दौर मंदो पड़बा रे बावजूद वठे मोटी तादाद मांय सैलाणी पूग रह्या है।

000

वन अर पर्यावरण मंत्री संजय शर्मा कह्यो है के प्रदेश मांय रोप्या जा रह्या पौधां रो भौतिक सत्यापन करा र वां रे जीवित रेहवण री रेट री ठा करी जा रही है। श्री शर्मा आज चित्तौड़गढ़ रा सर्किट हाउस मांय खबरनवीसां सागे बातचीत करता थकां आ जाणकारी दीनी। वे बतायो के प्रदेश मांय दस करोड़ पौधा लगावणो तैय करी ज्यो है अर हाल ताई करीब 8 करोड़ पौधा रोप दिया ज्या है। जंगलात हलका मांय व्हे रही गैर-कानूनी खुदाई ऊं जुड़्या सवाल रा जवाब मांय वे कह्यो के ऐंडी खुदाई राजस्व ज़मीं माथे करी जा रही है। श्री शर्मा चित्तौड़ रा किला हेटे रा जंगलात हलका मांय व्हे रह्या गैर-कानूनी कब्जां ऊं जुड़्या मामलां मांय ई बेगी कार्यवाही रो भरोसो दिरायो।

000